

Manusia mudah lupa nikmat

Usia panjang peluang terus jadi hamba yang taat dan bersyukur

Nikmat kehidupan aman yang dikurniakan Allah SWT adalah gambaran Allah amat mengasihani dan menyayangi hamba-Nya. Terlalu banyak nikmat yang dilimpahkan kepada isi dunia ini, tinggal lagi kita memanfaatkan setiap satunya dengan harapan untuk mendapat keberkatan-Nya.

Ada manusia cuba menghitung nikmat, membandingkannya dengan kesusahan hidup dihadapi, lalu ternyata kemewahan hidup yang Allah kurniakan tidak terkira. Nikmat melihat, mendengar, merasa, berfikir malah berkongsi kehidupan dengan penuh kasih sayang sesama makhluk Allah.

Tentulah kita tidak boleh menyekali kepayahan dan kesukaran hidup di dunia, anggaplah ada hikmah yang menanti sementara iman diuji, tetapi berusaha untuk mencari kesenangan.

Firman Allah SWT: "Dan jika kamu menghitung nikmat Allah yang dilimpahkan-Nya kepada kamu, tiadalah kamu akan dapat menghitungnya satu persatu. Sesungguhnya Allah Maha Pengampun lagi Maha Mengasihani." (Surah An-Nahl, ayat 18)

Tidak lupa syukuri nikmat

Ada kala kita tidak sedar apa yang dimiliki hari ini adalah nikmat dan ia bukannya sedia ada untuk setiap manusia kerana ada orang lain yang tidak dapat merasainya.

Sebab itulah kita tidak harus lupa mensyukuri segala kemurahan hati Allah SWT menganugerahkan sebuah kehidupan yang lengkap buat makhluk-Nya di bumi, cuma ada kemudahan yang

Allah sediakan tidak dapat dimanfaatkan akibat sikap manusia juga yang tidak tahu menghargai nikmat.

Sikap manusia yang mudah lalai dan lupa juga menyebabkan nikmat dikurniakan tidak memberi apa-apa faedah kepada manusia itu sendiri. Usia yang panjang sepatutnya diisi dengan kebajikan dan faedah kepada diri serta orang lain, tetapi dihabiskan aktiviti judi dan zina.

Tidak pula terkilan dengan kezaliman dan kejahatan meragut serta merompak, bahkan ada kehidupan orang lain yang terkesan juga disebabkan kejahilan ini.

Rasulullah SAW bersabda diriwayatkan oleh Al-Imam At-Tirmizi: "Tidak berganjak kedua kaki seorang hamba pada hari kiamat sehingga ia disoal mengenai umurnya pada perkara apakah ia habiskan, dan ilmunya untuk apakah ia gunakan, dan harta bendanya dari manakah ia peroleh dan pada apakah ia belanjakan, dan juga tubuh badannya pada perkara apakah ia susutkan kemudaan dan kecergasannya."

Guna tenaga, akal cari rezeki

Adanya tenaga dan akal guna-lah untuk mencari rezeki halal. Apa salahnya merasa nikmat yang Allah berikan percuma untuk dilaburkan bagi mendapat nikmat lain. Buat orang yang berhati-hati menjaga amanah Allah SWT, mereka tidak akan alpa dengan kemewahan dunia kerana tahu semua adalah pinjaman saja.

Sebaliknya, mereka berusaha meningkatkan limpahan rahmat dan nikmat itu supaya nikmat Allah yang ada padanya dapat dikongsi dengan orang lain yang kurang berkemampuan. Orang yang tidak melupakan hari akhirat walaupun dunia ini menjanjikan seribu kemewahan tidak membazirkan



Merosakkan sumber alam tanda tak hargai anugerah Tuhan. [GAMBAR HIASAN]

nikmat Allah dengan keangkuhannya sebagai manusia.

Memusnahkan imbalan alam, mengotorkan sumber air, membiarkan tanah tanpa tanaman dan menzalimi sesama makhluk Allah lainnya untuk nikmat sementara adalah petanda orang yang tidak mengetahui hakikat kurniaan nikmat dunia untuk menuju kehidupan akhirat lebih senang dan mewah.

AYAT AL-QURAN

"Dan jika kamu menghitung nikmat Allah yang dilimpahkan-Nya kepada kamu, tiadalah kamu akan dapat menghitungnya satu persatu.

Sesungguhnya Allah Maha Pengampun lagi Maha Mengasihani."

Surah An-Nahl
Ayat 18

Nikmat usia panjang

Sambutan ulang tahun kelahiran yang saban tahun diraikan haruslah dijadikan kayu pengukur sama ada nikmat usia dikurniakan benar-benar kita hargai. Adakah kita terus menjadi hamba yang taat atau ingkar, adakah kita menjaga hubungan sesama insan dengan baik atau kita menyusahkan orang lain.

Adakah kita banyak memanfaatkan kurniaan Allah atau kita membinasakannya dan adakah kita berbaloi diizinkan terus benafas?

Rasulullah SAW bersabda: "Daripada Abdul Rahman bin Abi Bakrah dari ayahnya, seorang lelaki telah berkata: Wahai Rasulullah! Siapakah sebaik-baik manusia? Berkata Rasulullah: Sebaik-baik manusia ialah orang yang dipanjangkan umurnya dan umur itu

dipergunakan untuk berbuat kebaikan. Berkata lelaki itu lagi: Siapakah sejahat-jahat manusia? Maka Rasulullah berkata: Sejahat-jahat manusia ialah orang yang dipanjangkan umurnya tetapi digunakannya untuk berbuat kejahatan." (Riwayat Al-Imam At-Tirmizi)

Usia yang panjang adalah satu nikmat tidak ternilai kerana kita terus dapat beribadat, merasai kehidupan, berkongsi kebahagiaan dan merencana masa depan. Jika nikmat usia diambil semula oleh pemiliknya maka kita tiada peluang lagi untuk terus menjadi hamba yang taat dan bersyukur.

Sebab itulah jika kita beringat bahawa setiap yang bermula itu ada akhirnya, maka usia adalah satu perincian sangat bermakna.

Firman Allah SWT: "Dan bagi tiap-tiap umat ada tempoh yang telah ditetapkan, maka apabila datang tempohnya, tidak dapat mereka dikemudikan walau sesaat pun dan tidak dapat pula mereka didahulukan." (Surah Al-Araaf, ayat 34)

Justeru, jika kita mengerti nikmat Allah SWT yang satu ini tidak boleh dirayu jika Allah menghendakinya semula, apalah daya kita. Sedangkan bertahun lamanya Dia berikan kita peluang dan ruang untuk memanfaatkannya demi kehidupan yang lebih abadi.

Janji-janji kosong juga tidak mampu menukar qada' dan qadarnya. Kita sepatutnya tersedar dari awal dan tahu bahawa kematian adalah pengakhirnya. Sedang pintu taubat sentiasa terbuka, janganlah kita longlai usaha untuk menjadi insan.



NIK SALIDA SUHAILA

Pensyarah Kanan
Fakulti Syariah dan
Undang-Undang
Universiti Sains
Islam Malaysia